

小方壺齋

小方壺齋

蜀遊日記

金谿黃勤業著

蜀險地也亦勝地也爲人所畏遊亦爲人所樂遊予性嗜山水思遊蜀者久矣而無力無文且恨且愧適同邑戴君耕野爲蜀丹棱令折柬相招與王星垣詞丈遊焉時丙戌正月六日也薄暮登舟泊於涪湖下岸檣頭新月艙裏故人相對爲之一快然默念皓首重堂黃口兒女離鄉之感又怛怛然動矣

初七日寒風細雨解纜凌晨水淺沙膠舟如蟻磨行不數里泊下馬山側山以王荊公下馬拜黃荊得名地有石亭顏曰同善緣山有迴風不利舟行當道者設救生船於山下誠善舉也

初八日大雨滂沱停舟不發

初九日細雨逆風舟行緩緩過流坊至于金坡古文昌堰也汝水逕流於此前人因風水之說開文昌新河引水城下築此堰以塞其故流誌有詩云金石臺分宰相出文昌堰合狀元生蓋指王晏一先生也

初十日雨意猶濃舟由文昌橋壘裏行泊郡城下撫郡名昭武又名羊城城內有羊角洞天石相傳昔有青城童子叩角而入故名橋名文昌者亦因文昌堰名非上應文昌星也

十一日冒雨放舟出河東灣至張家石泊萬魁塔下

十二日輕陰不雨過蕭公渡柴埠許家渡黃昏渡焦石李家渡溫家圳等處俱借風力自在而行所謂風正一帆懸也

十三日雨收雲潰東過荏港西過謝埠至烏沙港漸達鄱陽湖矣

十四日密雨如絲湖水橫流舟故窄復於柘林載貨窄益甚因憶隨園詩話中有跪著衣裳飢讀書之句舟中苦况可謂描寫盡致矣

十五日石尤肆虐阻舟不行元燈暖鼓寂寂無聞榜人圍鑪而歌此唱彼和亦有洋洋自得之樂然嘔啞

啾唧難爲聽也

十六日雲濤風微過八字腦舟行湖心湖面數百餘里水色連天渺無津涯惟見風帆沙鳥波光雲影而已行及半响忽見梅溪溪入捕魚爲業茅屋數椽斜敞岸脊小艇百隻環繫磯頭所謂漁村水作田也沿湖而西遠見康山明忠臣之廟在焉昔聞唐蝸寄先生題康山廟詩云食其祿者忠其事臣分君恩兩得之我過康郎山下拜愧他三十六男兒以風利不得泊未獲瞻仰廟貌迄今猶耿耿也

十七日打槳過湖湖集鴻鴈千百爲羣游戲波心壓水爲黑舟過處輒拍拍驚起夏書云彭蠡既豬陽鳥攸居是其地也按鄱陽湖古名彭蠡合饒信徽撫吉贛南安建昌臨江袁筇隆興南康數州之流下入於江其入江處西爲廬阜東爲湖口石山峙立水道不寬而蓄於上者甚大書稱既豬蓋云水之大而蓄者既治之也

十八日湖光朝霽過鐵門限至三山隨山行爲饒州出山側爲吳城余舟放乎中流俄而風起水湧波濤澎湃泊大雞山

十九日雪敲篷背風凍孟冰舟楫盡艱

二十日積雪盈尺湖山皆白如遊銀海中清光奪目舟行二三里烈風不息泊小雞山

二十一日殘雪初融輕漣乍漾過鑽子口至定江王廟山勢蜿蜒橫亙湖中舟行者咸於是割牲祈福廟前有劍沙沙脊隆然以直遊人履其上故以履迹縱橫亂之瞥眼間隆然如故神之靈地靈爲之歎西過南康府樓閣層層雉堞隱隱甕宮背塔城門面湖余得句云廬峰吐霧橫爲枕湖浪因風送到門蓋紀實也湖中有落星墩星子縣名始此東過寡婦磯石罇中立鐵杵或云岸有小村門當其磯立此杵者爲是村形勢所係余謂不然蓋石尖水急恐舟誤觸於此故立杵以表之也西過青山爲西江鹽艘停泊處舟

中遠望可見廬山峰脊插天山腰出雲疊嶂層巒巖突兀然霧靄溟濛未識真面目也又西沿蝦蟇石泊大姑塘九江分關駐此官廨森然西岸有陶公廟門外石碣載大姑靈異爲康熙三年豫章余方伯舟泊大姑山下忽見雲中神女絳衣蹁躑丰姿綽約立於山前俄而狂風大作波濤掀天鄰舟覆沒神女救一婦人餘無存者後聞婦人云彼舟載少年子數人肆嘲謔語褻及神獨婦人默坐乃蒙護救云云神傳爲藐姑仙人一作彩鸞其說雖不經然已立碑記其事可爲世之妄言者鑒吾人居敬慎言之心何可一息少懈也

二十二日移泊關下有山屹立湖中四無聯屬狀如弓鞋予得句云彭蠡湖中孤石起石峰削立如筆架塔影崢嶸廟巍峨其中隱隱有僧舍亭臺點綴竹蕭疏風送鐘聲花月夜餘不盡記東過湖口縣望石鐘山大石側立千尺下臨深潭風水相激吞吐有聲蘇長公一記洵不予欺也舟出湖口湖水直注皖江予舟逆流而上達潯陽江晚泊十八套則漏深矣江船紅火倒映波間光燄更長向讀江船火獨明句以爲星月皆隱船火猶明今乃知獨字卽更字解展被欲睡之間歌喉宛轉繞船而過緣此地有小艇十八載少婦賣笑終宵博纏頭以資衣食雖其風靡甚亦其情可憫矣

二十三日夜雨朝晴過九江府鎖江樓下九江爲江漢合流處水深岸闊其流浩瀚樓名鎖江殆郡城之扼要地也正容與間又見危樓翼然臨於城上背負匡廬面挹大江顏曰庾樓庾亮刺江州時建也越數里傑閣崇宏雕楹綺麗水榭臨風竹亭延月豐碑林立於掖垣較鎖江諸樓爲更勝者琵琶亭也九江習水戰多戰艘毀於風雨者半太平景象於斯可見舟行江中忽有黑物與波浮沈舟人告予曰此江豚拜風也風卽至矣言未既呼號奮發浪駭波馳物之有知覺者類如此

二十四日風如虎吼水若山立舟之顛蕩甚於鄱湖北過龍屏則出江西而入湖北境矣又北過武穴至

全家鎮過蕪州釣魚臺黃州維陽口予心膽皆寒不敢出視晚泊道士嶽風始定

二十五日布帆風穩過黃水港至南溪又南過巴河至武昌縣

二十六日曙霞初明放舟早行三江既過乃泊鵝市

二十七日一笠雲停片帆靜南過羊塢至青山又南至湖北省泊塘角

二十八日密雨濛濛舟泊不行南望黃鶴樓北望晴川閣皆隱約在雲氣中蓋武昌與漢陽相對人聲雷動貨物雲屯舳舻鱗鱗波而上下以千萬計誠楚北一大都會也

二十九日旭影徐動曉風息吹舟出漢關過龜山下卽大別山也漢水出其側因名漢口

三十日風寒水漲南過戰口至荊口北過煤炭洲至東江腦又北至脾洲

二月朔日風帆半挂煙霧繞舟南至嘉魚問金正希先生故里而父老無能道者

初二日曉起觀日出雲霞擁護湧躍江中倏而殷然倏而燦然倏而爛然倏而皎然一轉瞬間而銅鉦已挂碧落矣人言登泰山日觀夜半觀浴日景狀奇絕今從江中觀之種種奇相亦見一斑惜未登泰山頂

以盡覽乎陽谷之勝也南過蘆溪口至靖江王廟其地多烏鴉舟人呼爲鴉將繞舟飛鳴索食不避人與

之食卽飛去或擲食於空中亦一一接之無遺舟之占休咎者以鴉將之至不至爲驗神鳥也卓午遷舟

較前舟寬甚可坐看書而立穿衣矣出石頭關過沔陽至新地皆從清漣中安穩而渡晚泊羅山朔風怒

吼急浪喧空舟如箕簸竟夕不寐

初三日乘風破浪行數十里波濤之高十倍鄱湖予始而懼繼而悲終乃恍然曰死生有命惶惑何爲朋

誦讀心經數十過以自壯同舟者皆敬聽之此亦無可奈何強效宗慤而已南過荊關泊荊河口

初四日雨隨風勢急點打篷狂風捲舵泊觀音洲

初五日日華晃漾倒映晴波過上坂觜

初六日迅雷驟雨北過沙套

初七日天陰而寒水淺而曲逆風使帆船行折如之字泊車灣

初八日宿雨初晴微波乍漾舟進邇而行泊黃柏黨

初九日旭日浮紅光穿蓬隙南至條紅北至章家坡

初十日朝陰午霽北過石首縣至沱陽省征五十餘里微風蕩漾淡月輕盈如泛槎銀河飄飄平欲登仙矣

十一日乍明乍晦大雨欲來北過郝穴泊蟲蓼

十二日浪勢連天風聲拔木雨溜艙中水濺篷外風波之險至此極矣幸穩泊淺渚鄰舟夾輔舟中人安坐如故然寒甚雖重裘猶膚栗也

十三日濤頭不起雨腳猶橫泊江陵之沙市

十四日微風小雨移舟上岸沙市爲三楚名區闔閭十里有奇內有小河通荊州城所謂荆及衡陽惟荊州也

十五日朝雨晚晴遷蜀江之柏舟舟制與他處異雙桅拱立布帆正懸舟首有大木撥水曰招舟左右有大木割水曰尺前執招後執舵者稱太公看帆者稱外掌管執索者稱內掌管總理舟中事者稱板主左右槳夫五六十人少亦三四十人欸乃之聲不絕於耳當上灘時擊鼓作聲放爆爭先有端陽競渡之意十六日雲淡風輕過石套泊江口

十七日微波映日過董市至毛家廠江有神沙流動波中舟須避沙而行若稍沾滯頃刻湧成高洲卽陷

入不得出亦無形之險也

十八日殘星在水初日升天過羅家河至焦崖南過松滋至枝江又南至宜都所謂百里三縣也北過白楊市明張江陵葬此高岸墓道猶存晚行數十里泊紅花套岸駐宜昌卡關子夜柝聲藉杼宵警

十九日舟乘晴曉南過指佛山北過天然塔自九江以來土地平曠田野沃饒方數千里至此始見高山語云東南多水西北多山其信然矣

二十日山容滴翠水色浮藍北至宜昌府城下其地多坐船巨艦高篷不事載貨爲往來舟子聚會之所緣蜀江之舟未有牙行也南門城樓奉祀武帝勒馬望荊州像狀有憂色觀者悚然城外黃陵廟崇祀夏王香火甚盛宜昌爲蜀咽喉之區凡入蜀者咸禱於此廟前至喜亭壁書歐陽永叔記敘行人至此始脫險阻必漉酒再拜相賀以爲更生之情可謂深悉民隱者矣

二十一日亭午至南津關兩岸石山壁立于伋迴巒複嶂層出不窮遠望前途巖壑陡環雲煙迷滯似無去路行至水窮山盡之處豁然又開一境此險途之所由始也

二十二日晴崖竦桀倒挂枯松北過平甚壩至石脾岸達天星橋經黃柏洞山高水狹石危岸坼有欲裂之勢舟游其下不敢仰視晚泊南沱

二十三日凹峰銜日凸嶺截雲南過老黃陵廟至紅石灘亂石填水激水咽石篙力難支榜人負索登岸蛇行而挽舟此第一灘也過懶東灘破石千堆其流奔激峻絜魚鼈所不能游北至白水溪過伍員廟道黑崖泛曲溪南至通嶺灘江有尖石或出或沒土人名爲三炷香比紅石諸灘爲尤險客有善謀者將過灘時雇扁舟三泛尖石側客舟遙望而避之可保無虞凡涉川者不可惜此費也予舟過灘畢忽聞後來之舟倉皇絕叫云有楚人醢肉舟破人貨俱沒問彼舟何以醢肉名乃知蜀肉賤楚肉貴楚人射利者往

蜀業屠載肉而歸噫彼舟之覆殆傷天地好生之德歟而吾人殺生之心所宜戒也北至新灘衡宇踞山樓臺近水爲宜昌分府署上有上中下三處而上灘益險舟由北岸過下灘又轉南岸過中灘日西暝矣榜人懼未敢再行泊於巖石之下石激風濤聲聞十里崖飛雪瀑勢落千尋輕舟簸側幾有不測之變二十四日玉漏初沈金烏未躍卽過上灘灘水迅急舟不得上舉舟大聲呼曰上不得下不可力窮矣柰何予時塞衣在岸大加土人挽之須臾過灘彼此相顧面色如紙矣凡蜀舟未過灘時舟中客由小艇登岸越嶺前行俟舟過灘畢再從平岸登舟然惟上水則然下水不能也按新灘卽古之新崩灘水經注云漢和帝永元十二年兩岸山崩晉太元二年又崩崩時江水逆流百餘里湧起數十丈今灘上石或負如缶或方如屋若此者甚眾皆崩崖所隕致怒湍流當時名新崩灘今去崩字爲新灘耳北過湘溪峽至昭君村杜工部詩云羣山萬壑赴荆門生長明妃別有村亦天地英秀之氣鍾毓於此非偶然也村有昭君廟鄉人祀之香火亦盛夫昭君當入選時使毛延壽不索金而圖像不過一宮人耳安得垂名於今始則易美爲陋繼則獻圖於番延壽百計奸謀無非爲彰昭君之名也彼世之沮抑人者殆天使之玉入於成乎而被其阻抑者可了然於懷矣又北至方灘山遠岸闊水急石藏此第五灘也南望舊歸州周時夔子國也北有屈原故宅宅之東有女嬃廟擣衣石猶存北過新歸州隨山築城背嶺面江予得句云人家環澗曲城郭倚山尖言地僻也有巨石曰龜石舟行紆曲失勢堪虞涉川者苦之漢陽李姓者哀金雇石工百餘人欲舉觸舟之石盡去之有愚公移山之意善士也又北過葉灘碎石滿江折流衝岸水漲而灘急水涸而灘緩諺云有新無葉有葉無新蓋新灘水漲則水高於石水有定性舟之汴流差易葉灘水漲則水激於石水無定性舟之取道良難此時水涸新灘危險而葉灘平矣又北至蟒蛇寨小石微橫狂流遠激此第八灘也

二十五日灘聲雨聲喧厖滿耳過八斗灘至牛口灘水經注云江水東達黃牛山下有灘曰黃牛灘南岸重嶺疊起最外爲高崖有石如人牽牛之狀人黑牛黃成就分明然人迹所絕莫得究焉山巖既高加以江湍紆迴雖途經信宿猶望見之故行者謠曰朝發黃牛暮宿黃牛三朝三暮黃牛如故茲名牛口者殆古今稱名不同歟南過巴東縣傍嶺置邑不築城垣江左有秋風亭宋寇準蒞巴東時故蹟也又有東西漢溪人傳杜工部常居此草堂基址猶存由此達娘灘過官渡口入巫峽水經注云巫峽杜宇所鑿以通江水者也山水紆曲兩岸高峰重嶂非日中夜分不見曦月絕壁或十餘丈其石彩色形容多所像類昔李太白過此朝白帝而暮江陵計程于二百里雖乘奔御風不以疾也然當在夏水襄陵時耳今則素湍綠潭迴清倒影絕巘多生怪柏懸泉瀑布飛漱其間清瑩峻良多趣味又有老猿長嘯屬引悽異空谷傳響相應不絕故漁者歌曰巴東三峽巫峽長猿鳴三聲淚沾裳言峽中水險過者恆以臨懼相戒而猿聲多哀益令人增忉怛耳南過楠木園至傳林磧山多巖穴野人穿穴而居有上古餘風北過冷水磧山危且陡水洌而深嶺多桃樹紅花怒放芬芳數十餘里前人詩云川原遠近蒸紅霞非歷其境不知其妙也晚泊萬流方入四川之境

二十六日晚風微拂舟行霞天錦浪中花落如雨午過培石青石跳石三灘崖高千丈中無草樹飛鳥所不能棲

二十七日朝曦初紅南過白曉灘至九石灘絕岸壁立亦數百丈此第十七灘也又南至巫山縣神女之廟在焉夫夢境幻妄固已非真宋玉賦詞亦主諷諫而世竟以神女夢事豔稱開少年情竇何哉舟泊巫山下山上有女如雲緣蜀俗清明家家婦女上墳金翠瓏璦綺鮮明珊珊來遲環珮有聲好事者載酒邀賓登山聚飲借掃墓之名以觀婦女爲樂曰上野墳不啻舉國之若狂也

二十八日晨霧釀雨晚山絢晴北過龍保灘下馬灘沸騰如風雨之驟至湍激如金鐵之皆鳴此第十九灘也

二十九日瘴氣迷天沙壘蔽日北過三纜灘舵渚灘拗灘焦溪灘皆斜石橫江飛濤激岸舟行冥冥漠漠之中時虞觸石不勝戰兢矣

三月朔日天宇澄霽入夔峽中峰嶂陡懸曦月虧蔽與巫峽相埒而石色形容未若巫峽之奇怪也過瞿塘灘急水迴復沿沂艱甚灘上有神廟尤爲靈驗雖貴官經過舟中不得鳴金伐鼓客舟上水恐觸石有聲乃以布裹篙末峽亦多緩但不生北岸或取放於北岸卽不聞聲殆亦同貉之渡河而不生歟泛灩澦墩古稱爲淫預石又稱爲猶豫石言舟子取途不決水脈故猶豫也其石夏沒冬出高廿餘丈達魚復浦卽古稱爲魚國者也又東至白帝城原稱赤岬城漢時公孫述所造因山據勢周迴數里東高二百餘丈西北高千餘丈南連白帝山山甚高大不生樹木其石悉赤後名白帝城者以此是夕泊夔府城下其地平坦可十餘里江山迴闊入峽所無有武侯所造八陣圖皆累細石爲之聚石八行行間相去二丈因名八陣今所存止二三處餘則磨滅殆盡矣

初二日天無宿霧樹有新煙泊夔關下適有楚黃騷客移舟相見出簞索書贈詩求和甚歡也是日偕予遊永安宮爲武侯受先主遺命處今爲府學門設常關宮牆外望而已繼遊十賢堂堂上祀前賢常至蜀者屈原諸葛亮嚴挺之杜甫陸贄韋昭範白居易柳鎮寇準唐介十人堂外栽竹簞簞萬个扶疏可愛壁書王十朋題句云六月修篁帶雨移丁甯護取歲寒枝十賢清節高千古不是此君誰與宜詩清雋字亦古秀令人玩味不盡後遊武侯廟杜甫宅畢日欲西匿隨步城外遙望兩岸諸山掩映夕陽間環響陂立飛煙冥垂山下牧人驅犢亦芒芒而歸矣

初三日天朗氣清予舟估賃上稅稅畢恩恩出關泊於上岸

初四日微暄送暖澹蕩宜人南過馬湖雞翅二灘灘水急而不惡又南至老馬灘濤高勢猛石積灣多舟纜幾絕幸舟輕舵轉急避下流薄暮上灘啓視衣物皆如潸矣

初五日欲雨未雨雲氣沈沈北過蛟尾灘濤奔急箭浪蹴空花次過磁莊灘石板灘江石敝側水亦峻利後過廟磯灘灘有危石與波相戾舟趁旋潭祭潸而行惘懔驚人此第三十二灘也

初六日曉光晦暖過東陽灘江有破石亦謂之破石灘水勢灘聲如千弩齊發萬馬皆鳴予舟又不能支急加纜增人挽之乃濟北過雲陽縣南過二郎灘中流激石波浪迴旋次過大藏灘小藏灘岸石玲瓏透關石吞急浪吐納成聲北至曲播灘絕壁危懸上摩天漢衝波逆折下割雲根挽纜之人無踏步處昔有好善者置鐵索於石罅榜人攬之跪而行此第三十七灘也

初七日一輪曉日色若胭脂諺有云日出胭脂紅無風也有雨於是舟概不發予初嗤其言之誕也後果雨始知其占不爽云南過小石灘及長石灘激浪掀舞舟行駛甚北過紅沙灘一片平洲橫鋪巨石水道紆曲舟非挽數百丈纜不濟又北過峨眉灘水落石出磧形如眉晚泊萬縣城下燈火萬家塵市數里乃變屬衝繁邑也

初八日水涵霽色山靄晴嵐北過鳴金灘水激聲宏南過息風灘水深石陡又北過窄小灘江有碎礫間露嶮巖舟乘虛而過不甚驚人又南過小涪灘大涪灘千堆峭石激爲洶濤舟行不利漢陽李氏亦修理焉岸下立石柱可以繫舟岸上開坦途可以利步涉川者甚賴之晚過磨刀灘乃其小者此第四十七灘也

初九日波搖嫩綠日暈輕黃過武陵墟至石寶寨紅石削巖以千仞計喬木壽藤青翠相臨時有丹霞白

雲遊曳其上絕頂有廟無路可入傍石建塔數十層遊人藉塔登之入蜀以來所僅見也北過煙垵灘兩岸雲樹掩映灘波淨綠渡倒流灘江心石聳湍水逆流泛荷怕灘或傳爲荷延光沒處故名又北過折尾灘岸石折立驚波噴於石間此第五十一灘也

初十日曉霞攢日晃曜晴川南過九渡灘至獨柱灘架石嶽釜舟行危甚昔聞涉川者歌云灘頭白勃堅相持倏忽淪沒別無期今行險至此始信爲人子不臨深之戒所宜懷也北至思州欲訪陸宣公故宅不果

十一日岸花經雨逐水狂流北過白麻灘三條灘南過琮邊灘野貓灘石若彈棊滿江落落水如吼雪四面潺湲晚泊羊渚溪適於溪邊市得鮮魚王君喜曰此可以佐夜飲矣於是引滿酬酢浮爵無算兩人皆酣而就枕焉

十二日大霧漫天土人呼爲罩子諱言耳南過虎鬚灘怒流混混大聲震人次過鯉魚林角一灘渡湧躍之波心形如沸鼎避峻險之石骨勢若轉環午過鐵門灘則橫石塞江晚過巴嶺灘則峻嶺在岸此第六十二灘也

十三日舟帶雨行北過豐都縣人傳此地可通冥府城外殿宇滿山爲冥府十王天下城隍之廟南過蠶背灘至送客灘北過佛面灘至鯽魚灘大抵亂石高矗咽水有聲此第六十六灘也

十四日山綠水綠搖漾日光鼓枻過觀音灘土腦灘水石相激渦回數丈溯洄而北岸有梵宇者爲三官灘逆流而南江有黑石者爲羣豬灘過陟崖至涪州州治對岸有觀瀾園枕山面江結構宏敞爲育才之地涪州人文輩出殆當道者培植之力歟東城爲公灘河係通貴州之道亦險灘也北至里渡河神蕭公得道於此吾鄉商人立廟祀之卽爲西江嘉會之所

十五日沿岸漁家曬網腥風撲鼻予伏枕而臥者久之所過火風磨盤二灘未覩其形於殘夢中聞同事相語云二灘殊平穩宜黃君之適意華胥也南過蘭市北泛韓公陀石壁鐫老人像神形古樸不知爲何許人也渡臘月濠巨石填江水道窄甚又北過張家灘王家灘危石對峙夾鎖眾流灘水奔放如傾瓶之勢後至焦灘岸石漸平微有逆浪逕抵平岸遂泊焉白日西斜餘霞散綺啾啾棲鳥成隊歸林迴憶向在峽中不見日月今行平遠之處扣舷吟望心目朗然未幾而篷掩黃昏舵樓煙霧矣

十六日迎旭放舟至長壽縣所過和尚鶴石洋望金雞四灘灘水漂疾悉趁風力迅速而行望近岸低山勢欲動搖令人身若淩虛惴惴不定

十七日晴風漸暖北過馬嶺灘至葫蘆灘大石沈江回流激浪南過餓鬼灘至野驃灘危石在岸急水平流又南過彈石灘亦其小者此第八十四灘也自紅石灘至此大灘二十一小灘六十三俾利詭惡駭人心目清夜思之猶有餘悸予所經之險若此而所未經者又未知若何悍利若何詭惡此蜀道所以難於上青天也

十八日冒雨過理民廳卽重慶分府重慶地廣民繁分府亦理民事蓋閒篆而劇任也午泊重慶朝天門下從此陸途前進不事利涉矣因與王君負裝入城僑寓同鄉周培原藥肆賢主款賓大有如歸之樂考重慶爲古巴子國城踞石山其地起伏低昂不隔數武四圍雉堞都隨峭壁堆成不假修築城池鞏固儼若金湯矣

十九日清晨出通遠門尋先太高祖墓馬鬣纍纍極目十有餘里山坡踏遍無可識者已而登崔巍搜荆棘乃見一冢前有立石捫石索字里居宛然同也急辨其姓氏亦同而名則下蝕一字上一字同左右小字無存者予喜且疑同行者曰里居猶是姓名猶是一字剝落雪霜冰霰久則使然予何疑乎於是勉爲

奠掃而斜日西沈歸元寺晚鐘作矣夜歸與同人商修墓事疑心終未之釋憶先太高祖卒於茲土太高祖妣茹賢守節得旌於○朝終以不克扶輓歸葬爲恨今七十餘年矣予幸因館聘間關五千餘里來覓先塋得之而不修修之而或誤厥罪均也爰齋沐黎明乞籤城隍廟得萬里鵬程君有分吾山頂上快鑽龜之句初不解有長者相告曰渝城原名龜山可高處尋之如其言果得太高祖墓石碣完固字畫犁然遂負土累石增高壘焉後閱家乘乃知前得之墓卽予族人名同一字者也噫使非神之昭示幾何其不誤哉然雖神降之靈抑亦我太高祖默啓於重泉弗使予小子遠道悲惶而終莫之辨也

二十一日紅日滿窗猶貪美睡忽聞隔牆賣花聲方起沐因笑向在舟中心寒膽破輾轉反側竟夕無聊今則藤牀高枕穩入黑甜之鄉何其安而忘危也午遊武帝廟廟外雙杆高十餘丈俱用生鐵鑄成他處所無也謁萬壽宮規模壯麗遊者肩摩東廳爲予邑人祀宋先儒陸象山夫子處明吳疏山先生配焉祭日禮儀嚴肅品物輝煌予適與祭分胙而歸亦衣冠盛會也

二十二日登輿陸行華飛蝶粉露點蛛絲山徑風光又不同於水道矣行十餘里出浮圖關蒼蒼竹寺杳杳晨鐘石壁題詩石崖泐字石凹有佛像石凸有樓臺宛如小小城郭雉堞森然乃渝城扼要處也過白石驛宿走馬岡

二十三日赤日光炎薰風力輒肩輿者苦之過來鳳驛至丁家坳憩馬坊橋山橫黑石高白許丈上鐫鐵嶺二字以數丈計筆意遒勁顏魯公書字畫之大亦創見也宿永川城外

二十四日半天風雨迷漫高山出土硃鋪過黃葛樹道路泥濘人不堪行宿太平鎮

二十五日雨漬油幕風寒衿衣出石盤鋪至峰高場峰迴路轉茅店數椽爲行人之小憩者板橋村也山紆徑曲石碑雙立爲傳命之置郵者梧桐鋪也宿榮昌城內

二十六日一犁雨足四野農忙所過高池鋪梓梓場安富場李市鎮石燕橋等處無不林木密茂耕種紛紜可謂無曠土無遊民矣宿隆昌縣隆昌名棠城又名海棠香國海棠有色無香獨昌邑產者香以韻事而得佳名宜也自渝城陸行五日道路康莊行旅絡繹煙墩驚埃規模森嚴棠城黃明府鐫往來正大四字於碣蓋當成都之通衢也此後小徑低昂高峰重疊所謂山從人面起雲傍馬頭生者予見之

二十七日天半晴陰過龍市鎮至黃家場男婦貿易有醪錢飲酒者曰打平夥有酬酢飲酒者曰趕人情鄉鄰洽比又是一番風味宿牛佛渡

二十八日向曙早行沿途竹雞嘯聲未斷聞泥滑滑之音胸次豁然覺俗耳鍼砭詩腸鼓吹正不讓雙柑斗酒傾聽黃鸝時也過二龍橋至仙人石憩自流井石山有鹽井四五百所深二百餘丈闊只四寸許用修綆繫竹筒汲之上置轆轤一座旁用黃牛四頭以挽其綆此川鹽之所由出也古人言地形如雞卵天形如白地形如黃地在天中不爲甚大天之於地四面皆水蜀之鹽井殆與地脈相通不然以修綆汲四寸之井豈人力之所能鑿哉越二三里又見火井地中出火綠燄無煙不藉薪炭可以煮鹽亦天地自然之利下午出境肩輿在前行李在後有囑匪奪行李手持長刀勢欲搏人道旁觀者束手不救予率肩輿人力逐之乃免嗟哉關山難越誰憐遠道征人萍水相逢盡是他鄉過客遊子於此惟有殷殷小心瞻顧不失而已宿貢井鹽井亦多而火井未見也

二十九日曉出程家場高田刈麥淺水插秧老夫少婦絡繹田間雖襁褓之童亦咸挈以外出其手足勤動如此過張家場踰五通山憩高山鋪山中櫻桃正熟鄉人摘以餉客紅子離離承之綠葉令人欲玩不忍食也宿榮縣城外石壁巍峨上鑄佛像高百丈許金容燦爛輝映雲表綠蜀通西域活佛常顯神異故蜀人祀佛最虔凡崇山峻嶺多鑄寶相窮極莊嚴糜費物力所不惜也夜深坐旅舍中忽聞鄰人鼓樂大

作蓋蜀俗抱病之家不事醫藥倩人祈神祈者衣飾詭異絕似鮑老登場名跳端公予思人身陰陽不和氣血不通則病生焉故善醫者審脈虛實以清病源分藥重輕以調病體陰陽和血氣通其病乃去端公嬉戲事也安得去人之病殆效鄉人難之意歟

三十日曙色初開行經蠶市漸聞鼓聲隱隱由遠而近土人咸曰祭馬頭娘也是馬頭娘之爲蜀人無疑矣過老君臺至鐵廠鋪山徑崎嶇石崖律冽人行屈曲蹊中仰不見日殆所稱爲羊腸道者歟後歷長山橋來牟鋪踏紫山皆小村落竹籬茅舍饒有古風宿竹園鋪是夜鄉人作優戲登場不多人聲容俱無足取其班曰燈班調曰梁山調蓋由梁山縣人上元燈事所作而留遺以至於今也

四月朔日東方既白過觀音坡路斷橋橫林虛岫入行十餘里山愈高路愈險桀石巉巖輿夫擇以置足輿中人時怵傾墜至井研縣時飼蠶村莊采桑入城者紛紛野老提挈女子傾筐又依然桑市也憩涪發場宿分水嶺

初二日山光初爛下峻嶺踏蹊徑草樹蒙茸輿夫彳亍而行蘇蘇然如草蛇郭索矣過童家場石山聳立欲阻人行復穿山礪至虎渡溪溪水淨綠可通小艇遂濟渡至青神縣予自出隆昌城不勝蠶叢之苦至此田野平曠豁然開朗矣按蜀有西壩人傳爲二郎神所開壩水竭不至足盛不沒肩故蜀之力田者旱則藉以爲溉雨則不遏其流記曰水旱從人不知饑饉沃野千里世號陸海又謂之天府眉州水通西壩青神眉州屬也其土地沃衍如此

初三日風日晴和過黑龍場至惠蒙場鄉人繞徑種蠟樹卽冬青樹也翦伐枝條新葉濃密常以夏至日放蠟蟲於其上秋分而收之鄉人藉以致富者比比矣午憩觀音場山蹊多胡桃樹其華甚惡而無香予得句云徑繞無枝樹林開不豔花紀事而已是晚始抵丹棱署中噫自入日離家至此江天曉暮巖壑陰